

Na osnovu čl. 17., 22., 23. i 44. Zakona o Vijeću ministara Bosne i Hercegovine ("Službeni glasnik BiH", broj 30/03), čl. 18. i 25. Zakona o ministarstvima i drugim organima uprave Bosne i Hercegovine ("Službeni glasnik BiH", broj 5/03), a u vezi s članom 49. Zakona o upravi ("Službeni glasnik BiH", broj 32/02), Vijeće ministara Bosne i Hercegovine na 33. sjednici održanoj 3. decembra 2003. godine, donijelo je

ODLUKU O DIREKCIJI ZA EVROPSKE INTEGRACIJE

I - Opšte odredbe

I

Ovom odlukom, saglasno članu 23. Zakona o Vijeću ministara Bosne i Hercegovine, uređuje se nadležnost Direkcije za evropske integracije (u daljem tekstu: Direkcija), organizacija, način rada i rukovođenja i druga pitanja od značaja za rad Direkcije.

II

Direkcija je stalno, samostalno stručno tijelo Vijeća ministara Bosne i Hercegovine (u daljem tekstu: Vijeće ministara), koje obavlja poslove koji se odnose na usklađivanje aktivnosti organa vlasti u Bosni i Hercegovini, nadzor nad provođenjem odluka koje donose nadležne institucije u Bosni i Hercegovini, a koje se odnose na odgovarajuće aktivnosti potrebne za evropske integracije.

II - Nadležnost rada

III

Saglasno članu 18. Zakona o ministarstvima i drugim organima uprave Bosne i Hercegovine ("Službeni glasnik BiH", broj 5/03) Direkcija je nadležna:

za koordiniranje poslova na usklađivanju pravnog sistema Bosne i Hercegovine sa standardima za pristupanje Evropskoj uniji (acquis communautaire),

za usklađivanje aktivnosti organa i institucija u Bosni i Hercegovini koje se odnose na odgovarajuće aktivnosti potrebne za evropske integracije,

da učestvuje kao tehničko operativno tijelo za kontakte sa Evropskom komisijom,

za koordinaciju provođenja odluka koje donose nadležni organi i institucije Bosne i Hercegovine, entiteta i Brčko Distrikta Bosne i Hercegovine u odnosu na sve aktivnosti potrebne za evropske integracije,

da učestvuje u aktivnostima ili da izrađuje nacрте zakona, drugih propisa i smjernica koje se odnose na izvršavanje poslova koje je Bosna i Hercegovina dužna preduzimati u procesu uključivanja u evropske integracije, za djelovanje kao glavni operativni partner institucija Evropske komisije u procesu stabilizacije i pridruživanja, za koordinaciju pomoći Evropske unije Bosni i Hercegovini.

III - Unutrašnja organizacija

IV

Unutrašnja organizacija Direkcije uređuje se pravilnikom o unutrašnjoj organizaciji koji potvrđuje Vijeće ministara.

IV - Način rada

V

Ministarstva, drugi organi uprave, službe i institucije dužne su prije dostavljanja na razmatranje Vijeću ministara propisa i drugih pravnih akata, strateških projekata i programa, sporazuma i drugih materijala, kao i preduzimanja drugih aktivnosti koje se odnose na izvršavanje poslova potrebnih za evropske integracije, pribaviti mišljenje Direkcije.

VI

Direkcija je dužna na traženje ministarstava, drugih organa uprave, službi i institucija svoje mišljenje iz tačke V ove odluke dostaviti u roku od 10 (deset) dana od dana prijema takvog zahtjeva.

VII

Ministarstva, drugi organi uprave, službe i institucije trebaju u materijale koje dostavljaju Vijeću ministara ili aktivnosti koje preduzimaju u vezi s izvršavanjem poslova koje je Bosna i Hercegovina dužna preduzimati u procesu uključivanja u evropske integracije, prihvatiti i ugraditi stavove i mišljenja Direkcije.

VIII

Ako se ministarstva, drugi organi uprave, službe i institucije ne slažu sa stavovima iz mišljenja Direkcije, dužna su uz materijale koje u smislu tačke V ove odluke dostavljaju Vijeću ministara, priložiti mišljenje Direkcije i obrazložiti zbog čega neke od stavova iz mišljenja Direkcije ne prihvataju. U slučaju spora iz prethodnog stava, konačni stav utvrđuje Vijeće ministara i on je obavezujući.

V- Način rukovođenja

IX

Direkcijom rukovodi direktor kojeg imenuje i razrješava Vijeće ministara na prijedlog predsjedavajućeg Vijeća ministara saglasno Zakonu o državnoj službi u institucijama Bosne i Hercegovine.

Direktor je neposredno odgovoran za svoj rad predsjedavajućem Vijeća ministara.

Direktor saglasno Zakonu o državnoj službi u institucijama Bosne i Hercegovine ima status sekretara s posebnim zadatkom.

X

Direktor Direkcije ima pomoćnike direktora.

Jedan od pomoćnika direktora, po njegovom ovlaštenju, zamjenjuje direktora u slučajevima njegove odsutnosti i spriječenosti.

Pomoćnici direktora neposredno rukovode sektorom i odgovorni su za rad direktoru.

Pomoćnika direktora imenuje Vijeće ministara.

Pomoćnici direktora, saglasno Zakonu o državnoj službi u institucijama Bosne i Hercegovine imaju status pomoćnika ministra.

XI

Direkcija ima Stručni kolegij kojeg čine direktor i njegovi pomoćnici.

Stručni kolegij brine o usklađenom radu Direkcije i njezinih sektora, kao i usklađenom djelovanju s drugim organima i institucijama u provođenju poslova koje je Bosna i Hercegovina dužna preduzimati u procesu uključivanja u evropske integracije.

VI - Prelazne i završne odredbe

XII

Danom stupanja na snagu ove Odluke dosadašnje Ministarstvo za evropske integracije, uspostavljeno Zakonom o Vijeću ministara Bosne i Hercegovine i ministarstvima Bosne i Hercegovine ("Službeni glasnik BiH", broj 11/00) reorganizuje se u Direkciju s pravima, dužnostima i odgovornostima utvrđenim Zakonom o Vijeću ministara Bosne i Hercegovine ("Službeni glasnik BiH", broj 30/03), Zakonom o ministarstvima i drugim organima uprave Bosne i Hercegovine ("Službeni glasnik BiH", broj 5/03) i ovom odlukom.

XIII

Direkcija će preuzeti poslove, dokumentaciju, materijalno-tehnička sredstva i finansijske obaveze dosadašnjeg Ministarstva za evropske integracije.

Direkcija će preuzeti zaposlenike Ministarstva za evropske integracije koji ispunjavaju uslove iz pravilnika o unutrašnjoj organizaciji Direkcije koji su na dan stupanja na snagu ove odluke zatečeni na radu u Ministarstvu, u skladu sa Zakonom o državnoj službi u institucijama Bosne i Hercegovine.

XIV

Ova odluka stupa na snagu danom donošenja i objavit će se u "Službenom glasniku BiH".

VM broj 227/03

3. decembra 2003. godine

Sarajevo

Predsjedavajući

Vijeća ministara BiH

Adnan Terzić, s. r.